

XII դ. վերջին—XIII դ. սկզբին իրենց հայ Բագրատունիների ժառանգորդը համարող վրաց Բագրատունիների օգնությամբ Զաքարյան իշխանական տանը հաջողվեց սելջուկյան լծից ազատագրել հյուսիսային Հայաստանի մեծ մասը և ստեղծել ավատատիրական ենթակարգության սկզբունքով վրացական թագավորության կազմի մեջ մտնող հզոր իշխանապետություն: Այս տարածքում ձևավորվեցին մի շարք իշխանություններ, որոնցից մեկին տիրում էին Զաքարյան ավատական տան կրտսեր ճյուղը ներկայացնող Վահրամյանները¹: Խնդրո առարկա իշխանությունը ձգվում էր Գագ բերդից (Նոյեմբերյանի շրջանում) ներառյալ Շամքոր և Կուրից մինչև Սեանա լեռներ, ընդգրկելով պատմական Հայաստանի Կողբոփոր, Տավուշ, Գարդման, Շակաշեն և Փառխոս գավառների տարածքի նշանակալի մասը՝ Գագ, Քավաղին, Նրդեանը, Տավուշ, Կաթարեթ, Տերունական, Սազամ, Քարհերձ ու Գարդման բերդերով և Շամքոր քաղաքով հանդերձ: Եթե մինչ 1220-ական թթ. քննվող իշխանությունը տնտեսական, քաղաքական և տարածքային զարգացում էր ապրում, ապա մոնղոլների հետախուզական արշավանքներից (1220—1222) և խորհրդաճաճ Զալալ էդ-Դինի նվաճումներից (1225—1231) հետո բռնեց թուլացման ուղին: Սկսել էր թուլանալ նաև դեռ XIII դ. առաջին քսանամյակում պետական ուժեղ կազմավորում համարվող վրացական թագավորությունը: Այս հանգամանքը բացատրվում է ոչ միայն մոնղոլների հետախուզական արշավանքների ու Զալալ էդ-Դինի հրոսակախմբերի նվաճումների ընթացքում երկրին (հատկապես նրա արևելյան ու հարավային շրջաններին) հասցված ծանր հարվածներով, այլև պետության ավատական վերնախավի ներսում առկա տարաբնույթ հակասություններով: Դրանք գոյություն ունեին նաև երկրի պատմության նախորդ փուլում, սակայն, արտաքին հաջողություններով պայմանավորված, անհամեմատ թույլ էին արտահայտվում: Այժմ արդեն շարունակվող անհաջողությունների հետևանքով ավատական ավագանու շահերի նույնիսկ ընդհանրությունը վերաճել էր իր հակասությանը, վտանգելով պետության ոչ միայն անվտանգությունը, այլև տարածքային ամբողջականությունը: Ընդ որում, պետության թուլացումը և նրա ներսում հակասությունների սրումը փոխապայմանավորված և շարունակ խորացող երևույթներ էին: Այդ իրողությունն այնքան ակնառու էր, որ դրա արձանագրումից խուսափել չի կարողացել անգամ քրիստոնեական վարդապետությամբ սնված վրաց ժամանակագիրը, սրտի ցավով երկրի անհաջողությունների պատճառները փնտրելով ավատատերերի անմիաբանության և միմյանց հակադրվելու մեջ²:

Մինչդրի ճակատամարտից հետո (1229)³ Վրաստանում կենտրոնական ուժեղ իշխանությունն ըստ էության դադարեց որպես այդպիսին գոյություն

¹ Վահրամյանների իշխանության նախընթաց պատմության քննությունը տե՛ս Արտաշես Շահնազարյան, Վահրամյանների իշխանության պատմությունից (ՀՍՍՀ ԳԱ «Լրագր», 1974, № 4, էջ 104—113), նույնի՝ Վահրամյանների իշխանությունը մոնղոլների հետախուզական արշավանքների և Զալալ էդ-Դինի նվաճումների ժամանակ (նույն տեղում, 1980, № 6, էջ 50—63):

² «Վրաց ժամանակագրություն (1207—1318)», թարգմանությունը հին վրացերենից, առաջաբանը և ծանոթագրությունները Պարույր Մուրադյանի, Երևան, 1971, էջ 74:

³ Հ. Փարդարյան, Զալալ ադ-Դինի Հայաստան և Վրաստան կատարած արշավանքների պատմության շուրջ («Պատմա-բանասիրական հանդես», 1981, № 4, էջ 133): Իր այս շա-

ունենալու Բանն այն է, որ Վրաստանը վերջնականապես երկրորդական պետությունների շարքը դասած այդ ճակատամարտի սկզբում, որին մասնակցում էր նաև Վահրամ Գագեցին իր զորքով, Ջալալ էդ-Դինին հաջողվեց իր կողմը գրավել հայ-վրացական բանակի կազմում գտնվող 20-հազարանոց զփաղական զորաբանակը⁴, որը հրաժարվեց կռվել խորհեմշահի դեմ և դրանով իսկ ճակատամարտի ելքը վճռեց հօգուտ վերջինիս: Նախադեպը չունեցող այս միջադեպը կենտրոնական իշխանության համար զգալի հարված էր, քանի որ զփաղական զինական ուժն այն գլխավոր նեցուկն էր, որի վրա էր վրացական արքունիքը հիմնականում հենվում ավատական կենտրոնախույս ուժերի և արտաքին թշնամիների դեմ պայքարելիս: Կենտրոնական իշխանության վիճակն ավելի էր բարդանում նրանով, որ դահակալ Ռուսուդան թագուհին (1222—1245) ոչ միայն զուրկ էր մոր կառավարչական ունակություններից և երկրի կառավարումը հանձնել էր Ջաքարյան ավատական տան ներկայացուցիչներին («վարէր զիշխանութիւն թագաւորութեանն ի ձեռն զօրագլխացն Իւանէի, և որդւոյ իւրոյ Աւագին, և Շահնշահի՝ որդւոյ Ջաքարէի, և Վահրամայ և այլոցն»)՝, այլև պետության հեղինակությանը մեծապես վնասող և թաղակրին ոչ վայել վարքուբարքով՝ ու զուտ նեղ անձնական շահերով թելադրվող ներքին քաղաքականությամբ հարուցել էր երկրի ավատական ազդեցիկ շրջանների դժգոհությունը: Վերջինս ավելի խորացավ, երբ Ռուսուդանն օրինական թագածառանգի՝ Գեորգիի լաշայի որդի Դավիթի փոխարենն ոչ միայն 1236 թ. Քուլթախտում թագադրեց իր անչափահաս տղային, այլև փորձում էր կյանքից զրկել եղբորորդուն, որին աքսորել էր Կեսարիա, իր փեսայի՝ սուլթան Ղիա-

հեկան հողվածում 2. Մարգարյանը նկատել է, որ կռվկասագիտական գրականության մեջ Անգեր-կովկասում Ջալալ էդ-Դինի գործունեության «ուսումնասիրությունը կատարվել է հիմնականում տեղական՝ հայկական և վրացական աղբյուրների հիման վրա և այդ պատճառով էլ հարցերի ուրույնի՝ սկզբնաղբյուրների ընձևած նյութով սահմանափակված շրջանակ է ընգրկել» (էջ 125): Նա այդ եղանակով կատարված ուսումնասիրություն է դիտել նաև տողերիս հեղինակի «Վահրամյանների իշխանությունը մոնղոլների հետախուզական արշավանքների և Ջալալ էդ-Դինի նվաճումների ժամանակ (2002 ԳԱ «Լրաբեր», 1980, № 6, էջ 50—63) հողվածը: Իրականում այդ հողվածում Ջալալ էդ-Դինի և Վահրամյանների փոխարաբերությունները քննելիս մենք շրջանառության մեջ ենք դրել հարցի հետազոտմանը նպաստ բերող բոլոր օտար աղբյուրները (թվով հինգ): Ավելին, աղբյուրագիտական թուղիկ քննությամբ ոչ միայն կոահել ենք իրն հալոունի համար հիմք ծառայած մի տյլ օտար սկզբնաղբյուրի ղուլությունը, այլև ան-նասիվի տեղեկությունների վրա հենվելով պարզել 4. Գանձակեցու առ այդ մոլթ մի հաղորդման իմաստը (էջ 62): Մեր այդ հողվածում չենք արտացոլել 2. Մարգարյանի օգտագործած օտար աղբյուրներից (Իրն ալ-Ասիր, ան-Նասիվի, Ռաշիդ ադ-Դին, ալ-Բաղդադի) միայն վերջինը, քանի որ այն ոչինչ չի հաղորդում մեզ հետաքրքրած հարցի՝ խորհեմշահի և Վահրամյանների փոխարաբերությունների մասին: Իսկ ընդհանրապես մենք ես գտնում ենք, որ կռվկասագիտության զարգացման արդի մակարդակը և պահանջները բացառում են այս կամ այն հարցը լուի տեղական աղբյուրներով սպառել և համակողմանի լուսարանելու հնարավորությունը:

⁴ «Վրաց ժամանակագրություն», էջ 70, Р а ш и д а д-Д н н, Сборник летописей, т. I, кн. II, М.—Л., 1952, с. 28.

5 Կ ի Ր ա կ ո ս Գ ա ն ձ ա կ ե ց ի, Պատմություն Հայոց, աշխատասիրությամբ Կ. Ա. Մելիք-Օհանջանյանի, Երևան, 1961, էջ 238, հմտ. Վաղաքիա արևդայի Պատմութիւն վասն ազգին նևտողաց», ի լույս էած Ք. Պ. (այսուհետև՝ Գրիգոր Ակունացի), Ս. Պետերբուրգ, 1870, էջ 5: Բամարի զահակալության վերջին տարիներին և Գեորգի Լաշայի ու Ռուսուդանի օրոք վրացական արքունիքում Ջաքարյանների գերադաս դիրքն արտացոլում էր այն մեծ տնտեսական ու ռազմաքաղաքական կշիռը, որ ունեին վրացական թագավորության կազմի մեջ մտնող հայկական շրջանները:

6 «Օտար աղբյուրները Հայաստանի և հայերի մասին, 11, արաբական աղբյուրներ, Բ, Իրն-ալ-Ասիր» (այսուհետև՝ Իրն ալ-Ասիր), թարգմանություն քնադիր, առաջաբան և ծանոթագրություններ Արամ Տեր-Ղեոնդյանի, Երևան, 1981, էջ 314, Կ ի Ր ա կ ո ս Գ ա ն ձ ա կ ե ց ի, էջ 238:

Քեզդին Քեյ Խոսրովի մոտ⁷, Ռուսուդանի այս քայլերը հարուցում էին արևելավրացական իշխանների և Զաքարյանների դժգոհությունը, որոնք օրինական թագաժառանգ էին ճանաչում Գեորգի Լաշայի որդուն։ Անգամ վրաց ժամանակագիրը ոչ միայն պարզիպարզ պարսավում է եղբորորդու նկատմամբ թագուհու վարքագիծը, այլև չի կարողանում համոզել փաստարկներով արդարացին Ռուսուդանի որդու թագադրության արարողությանը արևելավրացական իշխանների ու Զաքարյանների բացակայությունը։ Ահա թե ինչ է գրում նա. «Այսպիսով թագավորությունը չէր մասնակցում [օծմանը] խորեզմցիների [պատճառով], քանի որ մանդատորթ-ուխուցեռ Շանշեն (Շահնազար—Ա. Շ.) Անիում էր, իսկ ամիրսպասայար Ավագը՝ Բջնիում, իսկ Վահրամ Գագեցին, հերացիք, կախեցիք, սոմխիթացիք, քարթլցիք, թորեցիք, շավշեցիք, կղարեցիք, տայեցիք՝ բոլորն էլ իրենց ամրոցներում էին պատսպարվել, յուրաքանչյուրը հնազանդ Ռուսուդանի թագավորությանը և զբաղվածությունը պատճառով չկարողացան մասնակցել Դավիթ թագավորի (Ռուսուդանի որդու—Ա. Շ.) հանդիսությանը⁸։ Եթե նշված իշխաններն իրոք հնազանդ լինեին թագուհուն, ապա վրաց ժամանակագիրը հազիվ թե զգար այդ հանգամանքը շեշտելու կարիքը։

Ջալալ էդ-Դինի անփառունակ կործանումից հետո (1231) վրացական թագավորությունն առժամանակ խաղաղ դադար ապրեց, սակայն երկրի վիճակն այդպես էլ չկայունացավ, իսկ կենտրոնական իշխանությունը գնալով թուլանում էր։ Ինչպես ճիշտ նկատել է Լ. Բաբայանը, «Այագ, Շահնազ, Վահրամ Զաքարյանները (նկատի ունի Վահրամ Գագեցուն—Ա. Շ.) անվանապես կրելով բարձրաստիճան տիտղոսներ, 13-րդ դարի 30-ական թվականների սկզբին պարփակվել էին իրենց ֆեոդալական տիրույթներում։ Ամիրսպասայարի, մանդատորթ-ուխուցեսի, աթաբեկի և մսախուրթ-ուխուցեսի պաշտոններն այդ շրջանում ոչ միայն կորցրել էին իրենց համապետական, համավրացական դերը, այլև նեղ իմաստով անդամ, համահայկական ֆունկցիա չկատարեցին⁹։ Այս երևույթը ևս պետք է բացատրել վրացական պետությանը համակած միջավայրական հակասություններով։ Ավելին, ըստ երևույթին նախանձիկ չէին նաև Զաքարյանների փոխհարաբերությունները։ Այսպես ինչով բացատրել այն փաստը, որ աղբյուրները համառորեն լուում են Գառնիի ճակատամարտին Վահրամ Գագեցուն և նրա զորքի մասնակցության մասին (գուցե դրա պատճառը Իվանե աթաբեկի դավանական անհանդուրժողականությունն էր)¹⁰ կամ թե այն, որ երբ 1229 թ. խորեզմշահը տառաջիորեն ամայացնում էր Վահրամյանների իշխանությունը¹¹, Իվանեն, Ավագն ու Շահնազը ոչ մի քալ չձեռնարկեցին նրան օգնելու համար։

Զաքարյանները, մասնավորապես Իվանե աթաբեկն ու Վահրամ Գագեցին, որոնց տիրույթները կից էին Գանձակի էլիթկուզյան աթաբեկությանը, վերջինիս վերացումից հետո չկարողացան շարունակել նրա տարածքի հաշվին

⁷ «Վրաց ժամանակագրություն», էջ 81—86, Կիրակոս Գանձակեցի, էջ 289, «Պատմութիւն նահանգին Սիսական արարեալ Ստեփաննոսի Օրբելեան արքայիսկոպոսի Սիւնեաց», Թիֆլիս, 1910, էջ 420—421։

⁸ «Վրաց ժամանակագրություն», էջ 68, Պ. Մուրադյանի ճշամամբ Ռուսուդանը որդուն թագադրել է 1236 թ. ոչ շուտ (Պարույր Մուրադյան, Հայաստանի վրացերեն արձանագրությունները, Երևան, 1977, էջ 155), երբ Վրաստանում խորեզմցիների գոյության մասին խոսք անգամ լինել չէր կարող։ Հետևաբար, վրաց ժամանակագրի բերած փաստարկը լիովին հիմնադուրի է։ Հմմտ. Հ. Գ. Մարգարյան, նշվ. աշխ., էջ 138—139։

⁹ Լ. Զ. Բաբայան, Հայաստանի սոցիալ-տնտեսական և քաղաքական պատմությունը XIII—XIV դարերում, Երևան, 1964, էջ 198։

¹⁰ Գառնիի ճակատամարտի հետ կապված հարցերի համապարփակ քննությունը տե՛ս Հայրապետ Մարգարյան, Գառնիի ճակատամարտի պատմության շուրջ (ՀՍՍՀ ԳԱ «Լրաբեր», 1982, № 3, էջ 72—81)։

¹¹ Մանրամասն տե՛ս նույն տեղում, 1980, № 6, էջ 61։

իրենց տիրություններն ընդարձակելու քաղաքականությունը, քանի որ էլթկուզյանների նախկին հողերն ընդունեցին մոնղոլական գերիշխանությունը¹²։ Այս ասպարեզում որոշ հաջողության հասավ միայն Վահրամ Գագեցին, վերադարձվելով Ջալալ էդ-Դինի խլած Շամբորը¹³։

Վրացական պետության աննախնայելի վիճակը չէր կարող հայտնի չլինել 1232 թ. Գանձակի գրավումից հետո նրա հետ անմիջական շփման մեջ մտած մոնղոլներին, որոնց արշավանքներին, որպես կանոն, նախորդում էր մեծագույն խնամքով կատարված հետախուզությունը¹⁴։ 1235 թ. մոնղոլական Ղուրուլթայի որոշման համաձայն հարձակում ձեռնարկելով վրացական թագավորության վրա և վստահ լինելով, որ հակառակորդն ի վիճակի չէ իրենց դեմ ուժեղ բռնեցք ստեղծել, Անդրկովկասում գտնվող մոնղոլական զորքերի հրամանատար Չարմաղանը հրաժարվեց միասնական մարտավարությունից և իր բանակը բաժանեց մի քանի խոշոր ջոկատների, յուրաքանչյուրին տալով այս կամ այն կոնկրետ շրջանի գրավման առաջադրանք¹⁵։ Լուր ստանալով մոնղոլական ներխուժման մասին, Ռուսուդանն ինչպես Ջալալ էդ-Դինի արշավանքների ժամանակ երկիրը թողնեց ճակատագրի քմահաճույթին և կրկին աճապարեց ալպանական ֆեոդալիտում¹⁶, դրանով իսկ ըստ էության բացասական պատասխան տալով մոնղոլների դեմ պայքար կազմակերպելու խնդրին¹⁷։ Ջաքարյանները ևս, որոնք, ինչպես միշտ, ստիպված էին թշնամու հարվածին առաջինն իրենց վրա վերցնել, թեկուզ սեփական ուժերը համախմբելու որևէ փորձ չկատարեցին, և մոնղոլներն անարգել ներխուժեցին վրացական պետության սահմանները։

1235/1236 թ. ամռանը¹⁸ Վահրամյանների իշխանության վրա հարձակված մոնղոլական երկու զորաջոկատներին գլխավորում էին Մուլար և Ղատաղա նոյինները¹⁹, ընդ որում, նրանցից վերջինին բաժին էր ընկել միայն Գարդման գավառը համանուն բերդով, ուր մոնղոլների հարձակման ժամանակ գտնվում էին Վահրամ Գագեցին և նրա որդի Աղբուղան։ Նախքան Մուղանի իրենց ձեռնադրությունից դուրս գալը, Մուլար նոյինը մոտ 100 հոգիանոց մի ջոկատ է ուղարկում, որը գալիս է և փակում Վահրամյանների իշխանության ծայր

12 Ի բ ն ա լ-Ա ս ի բ, էջ 346, տե՛ս նաև Պատմա-բանասիրական հանգես, 1981, № 4, էջ 137։

13 Մանրամասն տե՛ս ՆՍՍՀ ԳԱ «Լրագրեր», 1980, № 6, էջ 62։

14 Մ ի ք ա յ ի վ արդապետ Զ ա մ լ յ ա ն, Պատմություն Հայոց, հ. Գ, Վենետիկ, 1786, էջ 206։

15 Կ ի Ր ա կ ո ս Գ ա ն ձ ա կ ե Յ ի, էջ 237—238, Ս տ ե փ ա ն ո ս Օ Ր Բ Ե լ յ ա ն, էջ 403, «Հառաքումն պատմութեան Վ ար դ ա ն յ վ արդապետի լուսաբանեալ» (այսուհետև՝ Վ ար դ ա ն Ա Ր Է Ե լ Յ ի), Ի Վենետիկ, 1862, էջ 144։ Գերմանացի հետազոտող Բ. Լիմպերը ևս գրտնում է, որ միասնական մարտավարությունից մոնղոլների խուսափելը բխում էր հակառակորդի՝ իրենց դեմ միասնական բռնեցք կազմելու անկարողությունից (Die Mongolen und die christlichen Völker des Kaukasus. Eine Untersuchung zur politischen Geschichte Kaukasiens in 13. und beginnenden 14. Jahrhundert, vorgelegt von Bernhard Limper, Köln, 1980, S. 124)։


16 «Վրաց ժամանակագրություն», էջ 73։

17 Նախորդող ռուսագիտական հետազոտություններ, Ե. Լիմպեր, 1979, թ. 547։

18 Հայագիտության մեջ նվաճման նպատակով մոնղոլների՝ Հայաստան ներխուժելու թրվական է ընդունված 1236-ը, սակայն այս իրադարձությունների մասնակից Վանական վարդապետի ինքնաձեռագիր հիշատակարանը (Մատենադարան, ձեռ. № 4823, Թ. 155ա) վկայում է, որ նրանք Վահրամյանների իշխանության սահմաններն են մտել 1235 թ.։

19 Կ ի Ր ա կ ո ս Գ ա ն ձ ա կ ե Յ ի, էջ 241, Վ ար դ ա ն Ա Ր Է Ե լ Յ ի, էջ 144, Գ Ր Ի դ Ր Ա կ ա ն ա Յ ի, էջ 7—8։ Վարդան Արեելյան (և նրան հետևելով հետագա բոլոր հետազոտողները) պնդում է, թե Վահրամյանների իշխանությունը բաժին էր ընկել միայն Մուլար նոյինին։ Սակայն Կիրակոս Գանձակեցին նշում է, որ Գարդմանը գրավել է «այլ ոմն գլխաւոր... որում անուն էր Ղատաղա նոյին» (էջ 243)։

արեւելքում գտնվող Շամքոր քաղաքի մուտքերը Այդ քաղաքն ուներ ստրատեգիական ու առևտրատնտեսական խոշոր նշանակություն և դրա գրավումը մեծ կորուստ կլինէր Վահրամյանների համար: Քաղաքի ընկիւններ օգնություն են խնդրում Վահրամից և Աղբուղայից՝ միաժամանակ հայտնելով, թե մոնղոլները «Սակաւք են»²⁰, Աղբուղան, որը ժառանգել էր հոր խիզախությունը, բայց երիտասարդ լինելով դեռ չունէր Վահրամ Գագեցու փորձն ու իմաս-



տությունը, ցանկանում է շամքորցիներին օգնության շտապել, սակայն հայրը ոչ միայն արգելում է, «այլև ոչ քաղաքացեաց հրամայեաց մարտնչել ընդ նոսա», հայտարարելով, թե մոնղոլները «բազումք են»²¹: Գրականության մեջ Վահրամ Գագեցու այս տակտիկան ըստ էության որակվել է իբրև վախկոտություն, անգամ դավաճանություն²²: Սակայն Վահրամյան բազմափորձ իշխանին վախկոտության մեջ մեղադրելը հիմնադրվել է, քանի որ նա արտաքին թշնամիների դեմ պայքարում բազմիցս դրսևորել է իր քաջությունն ու անուրանալի զորավարական ձիրքը²³: Նրան դավաճանության մեջ մեղադրելը ևս անհիմն է, որովհետև, ինչպես տեսանք, Քուլթախում ապաստանելով Ռուսուդան թագուհին ըստ էության բացասական պատասխան էր տվել մոնղոլների դեմ պայքարելու խնդրին: Այնուամենայնիվ ինչով է բացատրվում Վահրամ Գագեցու նման պասիվ տակտիկան: Արդեն նշվեց, որ մոնղոլական ներխուժ-

²⁰ Նույն տեղում, էջ 212:

²¹ Նույն տեղում:

²² «История Азербайджана», т. 1, Баку, 1958, с. 177—178. «История Грузии», т. I, Тбилиси, 1962, с. 227, 228.

²³ Մանրամասն տե՛ս ՀՍՍՀ ԳԱ «Լրագիր», 1974, № 4, էջ 103—111, 1980, № 6, էջ 50—63:

ման նախօրյակին Վահրամ Գագեցին գտնվում էր իր իշխանության հարավ-արևելյան ծայրամասում ընկած Գարդման բերդում: Դա պատահական զուգահեռություն չէ և բացատրվում է մոնղոլներին ավելի մոտիկից հետևելու նրա ձգտմամբ (չմոռանանք, որ իբրև սահմանապահ կուսակալ նա պարտավոր էր իրականացնել թշնամական տարածքի հետախուզությունը): Որ Վահրամ Գագեցին սպառնիչ տեղեկություններ ուներ մոնղոլների մասին, երևում է նրա այն խոսքից, թե մոնղոլները «բազումք են»: Հետևաբար, դիմադրությունից խուսափելով, նա ձգտում էր Շամքորր և իր մյուս տիրույթները զերծ պահել ավելորդ ավերածություններից ու զոհեցից, առավել ևս, որ նրան չէր կարող հալածել յիսնել 1232 թ. մոնղոլներին դիմադրած Գանձակի և նրա բնակիչների տխուր-ճակատագիրը: Եվ, իսկապես, ինչպես սպասում էր Վահրամ Գագեցին, Շամքորրի մոտերքեր փակած մոնղոլների թիվը գնալով աճում է: Շուտով այնտեղ է գալիս Մուլար նույնը և ձեռնամուխ լինում քաղաքի գրավմանը²⁴: Շամքորրցիները թշնամուն կատաղի դիմադրություն են ցույց տալիս: Մոնղոլները Շամքորրի շուրջը փորված խրամատը լցնում են փայտով ու ծղոտով, որպեսզի նրա վրայով թափանցեն քաղաք: Սակայն շամքորրցիներին հաջողվում է գիշերը հրդեհել փայտն ու ծղոտը: Այս անգամ արդեն Մուլար նույնը հրամայում է պարսպին հավասար հողապատենը պատրաստել: Մոնղոլները հողապատենի վրայով թափանցում են Շամքորր, բնակիչներին անխնա սրի քաշում, քաղաքը կողոպտում և հրդեհում²⁵: Այնուհետև նրանք ձեռնամուխ են լինում Վահրամյանների իշխանության տարածքում գտնվող բերդերի գրավմանը: Կիրակոս Գանձակեցու վկայությամբ՝ ալայնքի, որ առին զՇամքորր, եկին ամենայն աղիսին իւրեանց ի Տաուշ, ի Կածարէթ, և ի նոր բերդն, և ի Գագ, և որ զշուրջ զնոցօք և ի նեղ արկեալ պաշարեցին զնոսա»²⁶: Այս իրադարձությունների մասին Գրիգոր Ականացին գրում է. «առին զառաջինն զՇամքորր... առին զԼուգամ [զՍագամ], զՔարահոժ, զՏերեկն [զՏերունական?] դմեծ դղիկն թագաւորանիստ. զԳարդման, զԵրզնանքն, զՄծնաբերդ, ... զՏաուշ»²⁷: Վարդան Արեւելցին, անդրադառնալով այս դեպքերին, համառոտակի խոսում է (հավաստելով իր սննդակցին) մոնղոլների կողմից «հնարիւք» Շամքորրը դռնվելու մասին և ապա, արձանագրելով նվաճողներից իր բերդերը Վահրամ Գագեցու ետ ստանալու իրողությունը, դրանց թվում նշում է նաև Քալազին ամրոցը²⁸: Ընդ որում, նա ընդգծում է, որ Վահրամյանների իշխանությունում գտնվող «ամրոցս և զգեօղս և զսպարակս. ամենեքեան տուեալ լինէին ի ձեռս նոցա (մոնղոլներին—Ա. Շ.) ի սուղ ժամանակս, անվաստակ և առանց աշխատութեան»²⁹: Կիրակոս Գանձակեցու պատմածից երևում է, որ մոնղոլները Վահրամյանների իշխանությունը գրավել են ամռանը³⁰: Ակադ. Հ. Մանանդյանը նկատել է, որ «Վահրամի երկիրը (Վահրամյանների իշխանությունը—Ա. Շ.) համեմատաբար քիչ էր տուժել, որովհետև նրա բերդերը կամոյին անձնատուր էին եղել և տվել էին մոնղոլական զորքերին իրենց անասուններն ու գույլը, ինչ որ սրանք պահանջել էին»³¹: Այս տողերի համար, անկասկած, հիմք են ծառայել գլխավորապես Կիրակոս Գանձակեցու տեղեկությունները: Իսկ դրանք արժանահավատ են, որովհետև պատմիչն այդ աղետալի իրադարձությունների ոչ միայն անաչափորոք, այլև անախտեսն էր և իր ուսուցիչ Վանական վարդապետի հետ բաժանել էր մոնղոլական գերության բոլոր սարսափներն ու տառապանքները: Բանն այն է, որ Զալալ էդ-Դինի կողմից 1229 թ. խորանաշատի

24 Կիրակոս Գանձակեցի, էջ 242:

25 Նույն տեղում:

26 Նույն տեղում, էջ 243:

27 Գրիգոր Ականացի, էջ 7:

28 Վարդան Արեւելցի, էջ 144—145:

29 Նույն տեղում, էջ 145:

30 Կիրակոս Գանձակեցի, էջ 244:

31 Հ. Մանանդյան, Քննական տեսություն հայ մոնղոլոգի պատմության, հ. Գ, Երևան,

կողոպուտից ու ավերումից հետո Վանականը, հավաքելով իր աշակերտներին, բնակություն էր հաստատել Տավուշ բերդի մոտ գտնվող մի քարայրում, կառուցել փոքրիկ եկեղեցի և ժողովելով «բազում գրեհան», շարունակում էր իր արդյունաշատ գիտամանկավարժական գործունեությունը³²։ Որք մոնղոլները մտնում են Տավուշ գավառ, սարսափահար անպաշտպան բնակչությունը ապաստանում է Վանականի քարայրում։ Տեսնելով, որ իրեն ապավինած ժողովուրդը տառապում է ծարավից ու քաղցից, Վանականը երկու աշակերտի հետ գնում է Մուլար նոյինի մոտ և գթություն հայցում։ Մոնղոլ գորապետը բավարարում է նրա խնդրանքը, չնայած գերում է Վանականին ու նրա սաներին, որոնց թվում և Կիրակոս Գանձակեցուն։ Ուշագրավ է, որ Մուլար նոյինը չիմանալով Վահրամ Գազեցու գտնվելու տեղը, Վանականի միջոցով էր փշրճում պարզել, թե որտեղ է նա³³։ Կիրակոս Գանձակեցին (և ոչ միայն նա) նշում է, որ մոնղոլները համեմատաբար մեղմ էին վարվում առանց դիմադրության իրենց ողորմածությանը հանձնվածների նկատմամբ, բավականանալով միայն ամեն մի քոչվորի համար սովորական կողոպուտով, ինչպես նաև նրանց վրավերակացուների կարգելով ու հարկ դնելով³⁴։ Դիմադրության որևէ փորձի հանդիպելիս մոնղոլները դիմում էին անխնա կոտորածի, ինչպես օրինակ Գանձակում, Շամքորում, Լոդիում, Անիում և այլուր։ Մոնղոլական նվաճման ժամանակ Վահրամյանների իշխանության համեմատաբար քիչ տուժելու մասին է խոսում և այն փաստը, որ Գագ բերդի բնակիչներն անգամ կողոպուտվելուց հետո կարողացան իր ժամանակի համար զգալի գումար (80 դահեկան) հավաքել և փրկագնել Վանականին (Կիրակոս Գանձակեցին գերությունից փախավ նույն օրվա գիշերը)³⁵։ Մոնղոլական նվաճման ժամանակ քիչ էր տուժել նաև Վահրամյանների վասալ Նոր Բերդի Կյուրիկյան իշխանությունը, այլապես սակավազոր Վասակ իշխանը դժվար թե կարողանար շարունակել և 1237 թ. ավարտել Նոր Վարագի Աստվածածին եկեղեցու կառուցումը³⁶։ Մինչ մոնղոլները նվաճում էին իր տիրույթները, Վահրամ Գազեցին որդու հետ տեղից տեղ էր փախչում և ի վերջո ապաստանեց Քութայիսում³⁷։

Մոնղոլական մյուս գորաջողատներն այդ նույն ժամանակամիջոցում իրագործում էին հյուսիսային Հայաստանի և արևելյան Վրաստանի նվաճումը։ Հասկանալի է, որ իրենց տիրույթներից զրկված կամ դրա սպառնալիքի առաջ կանգնած Զաքարյանները պետք է համապատասխան միջոցների դիմեին՝ դրանք հտ բերելու համար։ Քանի որ ուժով դրան հասնելը բացառվում էր, նրանք որոշեցին իրենց նպատակին հասնել մոնղոլներին հպատակվելով։ Առաջինն այդ քայլին դիմեց հոր մահվանից հետո (1234) Զաքարյան ավատական տան գլուխ կանգնած Իվանի որդի Ավագը, որը ժառանգել էր նաև վրացական պետության աթաբեկության պաշտոնը։ Նրան այդ քայլին մղեց դրություն անելանելիությունը և կամավոր իրենց հնազանդվելու մասին նրան մոնղոլների բազմիցս արած առաջարկները։ Ի վերջո, Սևանի ափին բանակած Զարմաղանի և Ավագի բանակցություններն ավարտվում են նրանով, որ վերջինս իր տիրույթները հտ ստանալու պայմանով համաձայնում են նրանով, որ մոնղոլների հարկատուն և զորքով մասնակցել նրանց հետագա ռազմական գործողություններին³⁸։ Ավագի օրինակին հետևում են սկզբում Շահնազ Զաքարյանը և ապա Վահրամ Գազեցին, որից հետո, ինչպես նշում է վրաց ժամանակագիրը, «հաշտություն ընդունած» նրա (Վահրամ Գազեցու—Ա. Շ.) երկիրը

³² Կիրակոս Գանձակեցի, էջ 244։

³³ Նույն տեղում, էջ 246։

³⁴ Նույն տեղում, էջ 243։

³⁵ Նույն տեղում, էջ 253, Վարդան Արևելցի, էջ 146, հմտ. Գրիգոր Ականացի, էջ 7—8։

³⁶ Կարո Ղաֆադարյան, Պատմահնագիտական դիտողություններ Նոր-Բերդի Կյուրիկյան իշխանության մասին (Արմֆանի «Տեղեկագիր», 1940, № 4—5, էջ 167—168)։

³⁷ Վարդան Արևելցի, էջ 144, «Վրաց ժամանակագրություն», էջ 73։

³⁸ Կիրակոս Գանձակեցի, էջ 254—257, «Վրաց ժամանակագրություն», էջ 74—75։

ևս խաղաղվեցա՞նք³⁹։ Չնայած աղբյուրները ոչինչ չեն հաղորդում, թե իր այս քայլին դիմելիս Ռուսուդանի հետ Քութայիսում գտնվող Վահրամյան իշխանը որքանով է հաշվի նստել թագուհու հետ, պնդելի է, որ նա ստացել էր վերջինիս գոնե լուռ համաձայնությունը։ Զաքարյաններից հետո մոնղոլներին հնազանդվում են նաև մնացած հայ ու արևելավրացական իշխանները⁴⁰։

Տալով վրացական պետություն ավագանու ներկայացուցիչների այս քայլերի գնահատականը, Գ. Մալաուրաձեն գրել է. «Ավատական էթիկայի տեսանկյունով այսպիսի վարվելակերպը, ինչ խոսք, պիտի նկատվեր որպես պետական նշանակության դավաճանություն, սակայն այն թագուհու... բարկության կամ բացասական ռեակցիայի տեղիքը չտվեց»⁴¹։ Նման գնահատականը թերևս խիստ է, քանի որ պետական դավաճանություն կարելի է համարել նաև անմիտ դիմադրությամբ երկրին ծանր աղետների առաջ կանգնեցնելը։ Բացի այդ, եթե այս իրադարձությունները գնահատելու լինենք «ավատական էթիկայի տեսանկյունով», ապա դրան առաջին հերթին պետք է հավատարիմ լինեք վրացական արքունիքը և պաշտպաններ իր հպատակներին, մինչդեռ այն, ինչպես ճիշտ նկատել է Ռ. Կիկնաձեն, «չկարողացավ (չփորձեց էլ—Ա. Շ.) իմի բերել ներքին ուժերը՝ մոնղոլներին վտարելու համար»⁴²։

Մոնղոլներին հնազանդվելուց հետո երկրի մյուս շրջանների նման Վահրամյանների իշխանությունն առժամանակ խաղաղ դադար ապրեց։ Նվաճումներից անմիջապես հետո մոնղոլները ձեռնամուխ եղան գրաված տարածքների տնտեսական ու քաղաքական յուրացմանը։ Ըստ վրաց ժամանակագրի, մոնղոլները «սկսեցին հաստատվել. ձմեռը բնակվում էին Պարտավում, Քուի ափին, Իորի եզերքին և վերև՝ մինչև Գագա»⁴³։ Ուրեմն, Վահրամյանների իշխանության հյուսիսային՝ մերձկուրյան դաշտավայրային արգավանդ շրջանը Շամքորից մինչև Գագ դարձել էր մոնղոլների ձմեռանոցը. այստեղ ևս լրացուցիչ արտավայրեր ձեռք բերելու նպատակով քոչվորական անասնապահությամբ զբաղվող մոնղոլներն անխնա ոչնչացնում էին այգիներն ու ցանքատարածությունները։

Գրաված շրջանների քաղաքական յուրացման նպատակով մոնղոլներն օգտագործեցին նույնիսկ ինստիտուտը, առանձին տարածքների քառավարումը դնելով այս կամ այն նույնի հսկողության տակ⁴⁴։ Ընդ որում, սկզբում մոնղոլներն Անդրկովկասում նվաճած հողերի վարչատարածքային բաժանումը թողեցին անփոփոխ և տեղական նախկին իշխողները դարձան այս կամ այն նույնի վասալը, պատասխանատու լինելով իրենց տիրույթներում հարկերի հավաքման ու դրանք մոնղոլներին հանձնելու համար։ Բացի այդ, նրանք պարտավոր էին իրենց լորքով մասնակցել մոնղոլների ուսուցական գործողություններին։ Չնայած աղբյուրները ոչինչ չեն հաղորդում, թե այս կամ այն շրջանը ո՞ր նույնի տնօրինության տակ դրվեց, տրամաբանական է կարծել, որ նրանցից յուրաքանչյուրին բաժին էր ընկել իր գրաված տարածքը։ Ուրեմն հավանական կլինեք ենթադրել, որ Վահրամյանների իշխանությունը տրվել է Մուլար նույնին, քանի որ դրա մեծ մասը նա էր գրավել։ Սակայն, ըստ Գրիգոր Ականացու, Մուլարը Վահրամյանների իշխանությունը նվաճելուց հետո Մուղանի իրենց ձմեռանոցը վերադառնալով վախճանվել է⁴⁵, եթե պատմիչը ճշմար-

³⁹ Վերաց ժամանակագրություն, էջ 75, հմտ. Կիրակոս Գանձակեցի, էջ 263, Գրիգոր Ականացի, էջ 8, Վարդան Արեւելցի, էջ 145։

⁴⁰ Կիրակոս Գանձակեցի, էջ 263, Վերաց ժամանակագրություն, էջ 76։

⁴¹ Զ. Մալաուրաձե, Վահրամյանների իշխանությունը, Երևան, 1982, ԳՅ. 97, տծ. 108, 1982, ԳՅ. 97, Գրիգոր Ականացի, էջ 10—11։

⁴² «Նախարարության օրենքների ծառայություն», Երևան, 1982, ԳՅ. 549։

⁴³ Վերաց ժամանակագրություն, էջ 76։

⁴⁴ Նույն տեղում, Գրիգոր Ականացի, էջ 10—11։

⁴⁵ Գրիգոր Ականացի, էջ 9։

տացի է, ապա պետք է կարծել, որ խնդրո առարկա իշխանություն տնօրինությունը թերևս հանձնվել է նրա տան վերակացու Զուլուլին⁴⁶։

1242 թ. Ռուսուդան թագուհին մոնղոլների հետ բանակցելու ուղարկեց Ավագ և Շահնազ Զաքարյաններին, Վահրամ Գազեցուն, ինչպես նաև Հերքի էրիսթավ Շոթա Կուպրին⁴⁷։ Մինչ բանակցությունները շարունակվում էին, մոնղոլները համրացած Զարմաղանին փոխարինած Բաշու նոյինի գլխավորությամբ ձեռնամուխ եղան հարավային Հայաստանի նվաճմանը, դրան մասնակից դարձնելով նաև հպատակ հայ ու վրաց իշխաններին՝ իրենց զորքերով։ Մոնղոլների համար հաջող ավարտ ունեցած այդ արշավանքներին (1242—1243) զորքով մասնակցեցին և աչքի ընկան նաև Վահրամ Գազեցին ու Աղբուդան։ Կարինի գրավումից հետո (1242) մյուս հայ իշխանների նման նրանք մոնղոլներից փրկագնեցին բազմաթիվ քրիստոնյա գերիներին, ինչպես նաև զնեցին նրանց թալանած բազմաթիվ հայկական ձեռագրեր, որոնք այնուհետև նվիրեցին Հյուսիսային Հայաստանի հոգևոր հաստատություններին⁴⁸։ Աղբուդան հատկապես աչքի ընկավ Իկոնիայի սուլթան Ղիթեդդին Քեյ խոսրոփի հսկայական բանակի դեմ 1243 թ. մղված Զմանկատուկի ճակատամարտում, Համաձայն Գրիգոր Ականացու, այդ ճակատամարտի ժամանակ հայ ու վրաց իշխանները և հատկապես «տերն Գագայ, որդին մեծին Վարհամայ, թուռն բլու Զաքարի, Աղբուդայ անուն, քաջապէս մարտուցեալ ընդդէմ զօրու սուլտանին... բազում ամիրայից և մեծամեծաց գլուխս հատեալ, յոյժ տրտմեցուցին զսուլտանն»⁴⁹։ Վահրամն ու Աղբուդան, անկասկած, մասնակցել են նաև Նրզնկայի, Կեսարիայի, Սեբաստիայի և այլ քաղաքների գրավմանը։

Արշավանքների ավարտից հետո Ռուսուդանի պատվիրակների ու մոնղոլների միջև բանակցությունները վերսկսվեցին, և թագուհին անվտանգության երաշխիքներ ստանալով՝ որդու հետ վերադարձավ Տփլիս։ Նրանց դիմավորողների թվում էր նաև Վահրամ Գազեցին⁵⁰։ Ռուսուդանն ընդունում է մոնղոլական գերիշխանությունը, իսկ մոնղոլները իրենց հերթին Ռուսուդանի որդի Դավթին ճանաչում են վրաց թագածառանգ։ Բաշուն նրան ուղարկում է Բաթու խանի զորակայանը, իսկ վերջինս իր հերթին թագածառանգին ճանապարհում է մեծ խան Մանգուի մոտ՝ Կարակորում։ 1245 թ. Ռուսուդանը վախճանվում է, և երկիրը մատնվում է անտեբուկյան, քանի որ Կարակորում էր ուղարկվել նաև Ավագ աթաբեկը։ Այս պայմաններում մոնղոլները երկրում մտցրին իրենց վարչաձևից բխող թումանների ինստիտուտը, վրացական պետությունը բաժանելով մի քանի ռազմավարական շրջանների՝ թումանների, որոնց գլուխ կարգվեցին տեղական ավատական ավագանու ներկայացուցիչները, վերածվելով մոնղոլական պաշտոնյաների։ Նրանց գործունեությունը վերահսկում էր այս կամ այն նոյինը։ Նկատի ունենալով այն հանգամանքը, որ ամեն մի թուման պարտավոր էր մոնղոլների ռազմական գործողություններին մասնակցելու համար 10-հազարանոց զորք հանել, վրացական պետության վարչատարածքային կառուցվածքում կատարվեցին էական փոփոխություններ։ Նախկին վարչական շրջանները խոշորացվեցին, հանգեցնելով դրանց թվաքանակի կրճատմանը (25-ի փոխարեն մնաց 7-ը)։ Վարչական այս բարեփոխումը նոյինների ինստիտուտի ստեղծումից հետո մոնղոլների հաջորդ քայլն էր՝ վրացական թագավորություն իրենց տնտեսական ու քաղաքական սիստեմի մեջ ընդգրկելու ուղղությամբ։ Վարչական նոր բաժանմամբ «Սգարսլան Բակուրցիսխելուն... հանձնեցին Հերքի, Կախքի, Կամբեխյանի զորքը, Թփղիսից մինչև Շամախու սարը։ Շանշին (Շահնազին—Ա. Շ.) հանձնեցին իր ու Ավագի կալվածքները, Վահրամ Գազեցուն՝ ողջ Սումխիթը, Գրիգոր Սուրամեյիին՝ Քարթլին, Թորել—Գամրեկեիին... Զավախքը, Սամցխեն և վերև՝ մինչ Կարնո

46 Կիրակոս Գանձակեցի, էջ 250, 251։

47 «Վրաց ժամանակագրություն», էջ 76։

48 Կիրակոս Գանձակեցի, էջ 279—280։

49 Գրիգոր Ականացի, էջ 14։

50 «Վրաց ժամանակագրություն», էջ 79։

բաղաձ, իսկ Յոտնե Դադեանիին ու Ռաճայի էրիսթավին՝ ողջ այնկողմյան թագավորությունը»⁵¹։ Մեջքերված հատվածից պարզ երևում է, որ Ավագի բացակայության պատճառով նրա և Շահնշահի տիրույթները դարձրել էին մեկ թուաման և հանձնվել վերջինիս⁵²։

Ինչ է նկատի ունեցել վրաց ժամանակագիրը, գրելով, թե Վահրամ Գագեցուն էր հանձնվել «ողջ Սոմխիթը»։ Դժվար չէ նկատել, որ Սոմխիթը = Հայաստան կամ Սոմխիթը = հարավային Վրաստան դիտելու դեպքում Շահնշահի և Գրիգոր Սուրամելու թումանները հանձնած կլինեին Վահրամ Գագեցուն։ Սոմխիթը Վահրամյանների իշխանության տարածքի հետ նույնացնելը ևս ճիշտ չի լինի, քանի որ նախ ժամանակագիրը հատուկ նշում է «ողջ Սոմխիթը» Վահրամ Գագեցուն հանձնելը և, բացի այդ, 10-հազարանոց զորք դուրս բերելու համար այն պետք է ունենար առնվազն 400.000 բնակիչ (մոնղոլները «հող ունեցող ինը գեղջուկից մի գինվոր գնացող էին սահմանում»)»⁵³, մի թիվ, որը չափազանց մեծ է։ Հետևաբար, Վահրամ Գագեցուն հանձնված թումանը պետք է ունենար նրա իշխանությունից մեծ տարածք, ընդգրկելով նաև սահմանակից որոշ շրջաններ։ Իսկ որո՞նք են դրանք։ Վահրամյանների իշխանությանը հյուսիսից Կուր գետով սահմանակից էր վրացական Կամեքիանի մարզը, որը դարձել էր Հերթի էրիսթավ Շոթա Կուպրի նախկին վասալ Եգաթուրան Բակուրցիսիսելու թումանի մի մասը։ Արևելքում այն սահմանակից էր Գանձակի նախկին աթաբեկությանը, որը երբեք վրացական պետության կազմի մեջ չի մտել։ Հարավից Վահրամյանների իշխանությունը կից էր Ավագի, իսկ արևմուտքից՝ Շահնշահի տիրույթներին (Սողք, Միափոր, Ձորոփոր, Կայեն, Լոռի)։ Ուրեմն Վահրամ Գագեցուն հանձնված թումանի մեջ են մտցվել հենց Կայենը, Ձորոփորն ու Լոռին, ինչպես նաև Սևանա լճի հյուսիսային ափին ընկած Սողքն ու Միափորը, որոնք հարավից կից էին Վահրամյանների իշխանությանը։ Այսպիսով, Վահրամ Գագեցուն թումանը տարածքով համապատասխանում էր Կուրիկյան նախկին թագավորությանը⁵⁴ և երկրի արևելքում Իվանե աթաբեկի ու Վահրամյանների նվաճած հայկական որոշ շրջաններին։ Հետևաբար, վրաց ժամանակագրի օգտագործած «Սոմխիթ» տերմինի տակ պետք է հասկանալ հյուսիսային Հայաստանի այսրկուրյան հատվածը, որի օգտին է խոսում ժամանակի հայ-վրացական աղբյուրների համադիր քննությունը⁵⁵։

Երկիրը թումանների բաժանվելուց հետո վրացական պետությունում ավատական ներհակություններն ավելի խորացան։ Դա մասամբ հետևանք էր երկրի փաստական կառավարիչ դարձած Եգաթուրանի դիրքերի ուժեղացման։ «Ողջ վրաց ազգը, — նշում է վրաց ժամանակագիրը, — նրա հրամանին է ենթարկվում... այդ թվում և... Շանշեն, Վահրամ Գագեցին և մյուս բոլոր իշխանները»⁵⁶։ Բնական է, որ երկրի մեծատոհմիկ ազնվականությունը չէր կարող հանդուրժել մինչ այդ ավատական սանդուղքում աննշան տեղ գրավող այդ երիտասարդ ու եռանդուն մարդու բարձրացումը։ Դժգոհելու հիմքեր ունեին հատկապես Շահնշահն ու Վահրամ Գագեցին, որոնք, ինչպես նշվեց, Ավագի հետ միասին Ռուսուդանի օրոք երկրում գերազդեցիկ դիրքեր էին գրավում (Վահրամ Գագեցին վարում էր պետության մսախուրթ-ուխուցեսությունը)։ Հենց Վահրամ Գագեցին ու Շահնշահն էլ անցան Եգաթուրանին ընդդիմադիր

⁵¹ Նույն տեղում, էջ 88։

⁵² Հետևաբար, Պ. Ինգորովան սխալվում է այս թումանը դիտելով երկուսը (Павле Ингороква, Шота Руставели (1166—1250), («Литературная Грузия», 1972, № 1, с. 85)։ Թումանների թիվը 8-ն է հաշվված նաև «Վրաստանի պատմության ակնարկներում» («საქართველოს ისტორიის ნარკვევები», ტ. III, გვ. 553)։

⁵³ «Վրաց ժամանակագրություն», էջ 108։

⁵⁴ Նկատենք, որ Դ. Ալիշանը Վահրամ Գագեցուն անվանում է «ժառանգ Կուրիկյան թագավորաց» (Վարդան Արևելցի, էջ 144)։

⁵⁵ «Սոմխիթ» տերմինի մասնավոր քննությանը մտադիր ենք անդադառնալ առանձին հոդվածով։

⁵⁶ «Վրաց ժամանակագրություն», էջ 90—91։

ավատական խմբավորման գլուխ, 1245 թ. դիմելով վճռական գործողություններին՝ Վրաց ժամանակագրի համաձայն՝ Կոխտասթավիում «հավաքվեցին թագավորության դիպեհուլները, որովհետև Եգարսլանը ցանկանում էր իշխանավոր դառնալ նրանց հանդեպ, որ նրանցից ազնվատոհմիկ չէր։ Ուստի հավաքվեցին Վրաստանի իշխանները։ Շանշեն, Վահրամ Գագեցին, Ղվաղվարե Զադելին, Սարգիս Թմոզվեցին... Գրիգոր Սուրամելին՝ Քարթլիի էրեսթավուր, Դամրկել Թորեկին, Օրբելինները և բազում [այլ] իշխանավորներ։ Սկսեցին որոնել կաշայի որդի Դավիթին»⁵⁷։ Խորհրդակցության մասնակիցների կազմից երևում է, որ Եգարսլանի հակառակորդների թվում էին մնացած 6 թուամաններից 4-ի պետերը։ Պարզվում է նաև, որ Կոխտասթավիում հավաքվածները «սկսեցին որոնել Գեորգի կաշայի որդի Դավիթին»։ Բայց չէ՞ որ սրանք ժամանակին Ռուսուդանի որդու թագադրության արարողությանը մասնակցելուց խուսափած վրացական ու հայ իշխաններն էին, որոնք այժմ պահջ հարմար էին դիտում թագի իրենց թեկնածուին գահ բարձրացնելու և, միաժամանակ, նորինյակ Եգարսլանին ասպարեզից հեռացնելու համար։ Պատահական չէր նաև խորհրդակցությանն արևմտավրացական իշխանների չմասնակցելը։ Ըստ երևույթին նախքան խորհրդակցությունը նրան հրավիրվածները կամ իրողեկ էին պահվել հավաքվելու նպատակի մասին և Ռուսուդանի որդուն հավատարմության երդում տված արևմտավրացական ավատները չէին ներկայացել և դրանով իսկ ձեռնպահ մնացել նրա դեմ որևէ քայլ կատարելուց կամ էլ հավաքի կազմակերպիչները նրանց պարզապես չէին կանչել, քաջ գիտակցելով, որ կփորձեն ձախողել իրենց պլանները։

Խորհրդակցության ավարտից հետո նրա մասնակիցները դիմում են Բաշու նոյինին, խնդրելով Կեսարիայից բերել և գահ բարձրացնել Գեորգի կաշայի որդուն։ Մոնղոլներին, իհարկե, վրացական, թագավորությանը համակած ավատական ներհակությունները ձեռնտու էին։ Սակայն նկատի ունենալով, որ կենտրոնական իշխանության բացակայության պատճառով դրանք կարող են ընդունել արյունահեղ բնույթ, խախտելով երկրի ներքին անդորրը, մոնղոլական տեղական իշխանությունները որոշեցին ընդառաջել խորհրդակցության մասնակիցներին, առավել ևս, որ ըստ երևույթին Կարակորումում գտնվող Դավիթի մասին նրանց ևս ոչինչ հայտնի չէր։

Գեորգի կաշայի որդուն գահ բարձրացնելու գործում Վահրամ Գագեցու ակնառու դերը շեղում էր և՛ «Վրաց ժամանակագրությունը», և՛ Կիրակոս Գանձակեցին և՛, մանավանդ, Գրիգոր Ականացին, չնայած այս իրադարձության հետ կապված որոշ մանրամասներում նրանք երբեմն իրարամերձ են։ Այսպես, օրինակ, ըստ Կիրակոս Գանձակեցու, Գեորգի կաշայի որդին գահի թեկնածու է առաջադրվել դեռ Ռուսուդանի կենդանության օրոք⁵⁸, Սակայն այս վկայությունը հերքվում է ոչ միայն վրաց ժամանակագրի, այլև Գրիգոր Ականացու տվյալներով, որոնց համաձայն «Ուռուզուքան մահումը փոխեցաւ յաշխարհէս. և վիրք մնացին անտերունչք... ապա... ընդ միտ արկեալ զորդին թագաւորին իւրեանց զԴաւիթ, որ էր ի բանտի ի Հոռոմք»⁵⁹։ Երբ խորհրդակցության մասնակիցները Բաշու նոյինին հայտնում են Գեորգի կաշայի որդի Դավիթի Կեսարիայում գտնվելու և նրան գահ բարձրացնելու իրենց ցանկության մասին, նա իր զորահրամանատարներից Անգուրակին 100 զինվորով Վահրամ Գագեցու և Սարգիս Թմոզվեցու հետ միասին ուղարկում է Կեսարիա՝ արքայորդուն հայրենիք բերելու առաքելությամբ⁶⁰։ Նրանք հաջողությամբ հասնում են Կեսարիա, գտնում Դավիթին և բերում Տփլիս, որտեղ նրանց մեծ շուքով դիմավորում է երկրի ավագանին, բացառությամբ Եգարսլանի⁶¹։ Դավիթ-

57 Նույն տեղում, էջ 95։

58 Կիրակոս Գանձակեցի, էջ 288—289, 315—316։

59 Գրիգոր Ականացի, էջ 17։

60 «Վրաց ժամանակագրություն», էջ 95, Գրիգոր Ականացի, էջ 18, Կիրակոս Գանձակեցի, էջ 288։

61 «Վրաց ժամանակագրություն», էջ 96։

թը Մծխեթում վրաց կաթողիկոսի կողմից օծվում է թագավոր⁶² (թագադրմանը ներկա էին նաև Վահրամ Գագեցին ու Աղբուղան), և ապա իր կողմնակիցների հետ ներկայանում Բաշու նոյինին: Նրան մոնղոլների մոտ տարած Վահրամ Գագեցին հայտարարում է հետևյալը. «որդի արքայի մերոյ է և տարապարս զրկեալ է ի տերութենէ իւրմէ»⁶³, Բաշու նոյինը Դավիթին Սարգիս Թմոզվեցու, Աղբուղայի և Շահնշահի որդի Զաքարիայի հետ ուղարկում է Բաթու խանի մոտ: Սակայն վերջինս Դավիթին գահի վրա հաստատելու իրավունքը թողնում է մեծ խան Գոյուկին և Աղբուղային ու Զաքարիային իր մոտ պահելով, թագաժառանգին Սարգիս Թմոզվեցու հետ ուղարկում է Կարակորում: Գահի երկու հավակնորդներին (Գեորգի Լաշայի և Ռուսուղանի որդիներին) 1246 թ. Կարակորումում հանդիպած Պլանո Կարպինին նշում է, որ նրանցից յուրաքանչյուրը իր կողմնակիցների օգնությամբ բերելով համապատասխան փաստաթղթեր, ձգտում էր ինքը տիրանալ գահին⁶⁴, Նույնն է հաղորդում նաև «Վրաց ժամանակագրությունը»⁶⁵, Այդ ընթացքում մոնղոլներն Ավագին «շուրջ հինգ տարի»⁶⁶ Կարակորումում պահելուց հետո ուղարկում են Վրաստան: Տեղ հասնելուն պես նա մտրակահարում և պատվազրկում է իրեն ձիու վրա դիմավորել համարձակված Ֆարսլանին⁶⁷, հուրախություն նրա հակառակորդներին, մասնավորապես Վահրամ Գագեցու, ինչ վերաբերվում է գահակալության հարցին, ապա մոնղոլները հավատարիմ իրենց ավանդական քաղաքականությանը՝ «զորգու իրար դեմ... իշխաններին, պահպանել անմիաբանությունը նրանց մեջ, հավասարակշռել նրանց ուժերը»⁶⁸, վրացական թագավորությունը բաժանեցին երկու մասի: Արևելյան Վրաստանը և Զաքարյան Հայաստանը բաժին ընկավ Գեորգի Լաշայի որդուն, իսկ Արևմտյան Վրաստանը՝ Ռուսուղանի տղային: Նրանցից առաջինը ստացավ Ուլու Դավիթ, իսկ երկրորդը՝ Դավիթ Նարին անվանումը:

1247 թ. թումանները վերակառուցվեցին: Ավագ աթաբեկը Կարակորումից վերադառնալով ստանձնեց ժամանակավորապես Շահնշահին հանձնված իր կալվածքներին (որոնք կազմեցին առանձին թուման) կառավարումը: Բացի այդ, Գյուրջիստանի վիլայեթի կազմում (այժմ այդպես էր կոչվում վրացական թագավորությունը) ստեղծվեց ևս մեկ թուման և այդպիսով դրանց թիվը հասավ 9-ի: Այս մասնակի վարչական վերափոխումները շոշափեցին նաև Վահրամ Գագեցու թումանի սահմանները⁶⁹, չնայած այն այժմ մեծ դժվարությամբ կկարողանար 10-հազարանոց զորք դուրս բերել:

1248 թ. հարկահավաքման նպատակով Անդրկովկաս եկավ բասղաղ Արդունը: Կողոպուտ հիշեցնող այդ հարկահանությունը (գանձվում էր հարկատուի շարժական ու անշարժ ունեցվածքի 1/10—1/30 մասը) ուղեկցում էր բազմաթիվ կամայականություններով, ուստի հարուցեց անգամ մոնղոլներին հլու հնազանդ հայ ու վրաց իշխանների դժգոհությունը, տեղիք տալով ապրս-

⁶² Կիրակոս 9 ա ն ձ ա կ ե ց ի, էջ 289: Այստեղ պատմիչը դպրերի ժամանակագրական կարգը շփոթել է:

⁶³ Նույն տեղում:

⁶⁴ «Путешествие в восточные страны Платона Карпини и Рубрика», М., 1957, с. 75

⁶⁵ «Վրաց ժամանակագրություն», էջ 99—100:


⁶⁶ Նույն տեղում, էջ 97:

⁶⁷ Նույն տեղում, էջ 100:

⁶⁸ C. Marx, Secret Diplomatic History of the Eighteenth Century, London, 1899, p. 38 (մեջբերումը տե՛ս աշայ ժողովրդի պատմություն, հ. III, Երևան, 1976, էջ 624):

⁶⁹ Մաթոսավանքի (Իջևանի շրջանում) Աստվածածին եկեղեցու շինարարական արձանագրության համաձայն այն գրվել է 1247 թ.՝ «Իշխանութեան Ավագին»: Դա նշանակում է, որ այդ շրջանը նորից գտնվում էր Ավագի տիրությունների սահմաններում («Գիվան հայ վիմագրություն», պրակ VI, կաղմեցին Ս. Ա. Ավագյան, չ. Բ. Ջառնիսի, Երևան, 1977, էջ 15):

տամբուլյան: 1249 թ. տեղի ունեցած այդ ապստամբությանը⁷⁰ մասնակցեց նաև Վահրամ Գագեցին⁷¹, Հայ և վրաց խոշոր ավատների այս ընդվզումը, սակայն, մատնության պատճառով հենց սկզբից դատապարտվեց ձախողման: Ապստամբության կազմակերպիչների տիրույթներն անխնա ավերվեցին (ըստ վարդան Արեելցու և Կիրակոս Գանձակեցու առավել շատ տուժեցին վրացական շրջանները)⁷², իսկ նրանք մահից կարողացան ազատվել միայն փրկագնվելու և մոնղոլներին ձիեր տալու միջոցով: 1249 թ. ապստամբությանը Վահրամ Գագեցու մասնակցությունը շուրջ շորս տասնամյակ երկրի քաղաքական կյանքում նրա խաղացած մեծ դերի վերջին ակտն էր: Այս իրադարձությունից հետո նա այլևս աղբյուրներում չի հիշատակվում, իսկ 1252 թ. խորանաշատում գրված ձեռագրերից մեկի հիշատակարանից պարզվում է, որ այդ թվականին նա այլևս կենդանի չէր⁷³, Վահրամյանների իշխանությունը գլխավորում էին Աղբուղան, որը, անշուշտ, ժառանգել էր հոր մսախուրթ-ուխուցեսության պաշտոնը և նրա որդիները՝ Վահրամը, Զաքարեն ու Իվանեն («ի գլուխ իշխանութեան երկրիս այսմ Աղպուղային և որդոց իւրոյ Վահրամ և Զաքարե և Իվանեն»)⁷⁴: Ի դեպ, Աղբուղայի որդիներին նույն հաջորդականությամբ է հիշատակում նաև Կիրակոս Գանձակեցին⁷⁵, Այսպիսով Վահրամյանների տոհմածառը ստանում է հետևյալ տեսքը.



Վերահիշյալ հիշատակարանը կարճառոտ տեղեկություններ է հաղորդում 1250-ական թվականներին Վահրամյանների իշխանության աննախանձելի վիճակի մասին. «գրեցաւ... գիրքս այս ի թուարեք ամանակաց Հայկազնեան ի Զ և ի Ա համարին [1252], ի նեղ և ի դառն ամանակիս և ի դարուս հետեման և այս վասն մեղաց մեռոց, զի բազմացաւ անհնարին վիշտք և նեղութիւնք ի վերայ

⁷⁰ Ապստամբության մասին տե՛ս «Վրաց ժամանակագրություն», էջ 93—95, Կիրակոս Գանձակեցի, էջ 319—321, Գրիգոր Ականացի, էջ 20—21, Վարդան Արեելցի, էջ 148:

⁷¹ «Վրաց ժամանակագրություն», էջ 95:

⁷² Վարդան Արեելցի, էջ 148, Կիրակոս Գանձակեցի, էջ 320—321:

⁷³ Մատենադարան, ձեռ. № 2273, թ. 361բ:

⁷⁴ Նույն տեղում:

⁷⁵ Կիրակոս Գանձակեցի, էջ 163:

⁷⁶ Վահրամյանների տոհմի ավագ սերունդների ներկայացուցիչների մասին տե՛ս ՆՍՍՀ ԳԱ «Լրաբեր», 1974, № 4, էջ 103—104, 107—108: Կ. Թումանովը Վահրամյանների տոհմածառը հասցնում է մինչև XIX դ. կեսերը: Սակայն պետք է նկատել, որ այդ տոհմածառը Վահրամյանների ավագ սերունդներին վերաբերող հատվածներում անգամ խիստ սրբագրելի է, իսկ հետագա, սերունդների տոհմածառը աղբյուրներով չի հիմնավորվում (Cyrille Toumanoff Manuel de Généalogie et de Chronologie pour l'histoire de la Caucaste Chrétienne (Arménie-Géorgie-Albante), Roma, 1976, p. 297—301):

ամենայն աշխարհի, ի ձեռն անաւրէն և այլակերպ զարուռն նետողաց, որով քաղմացեալ են քան զամենայն զաստեղս և քան զավազ ծովուս»⁷⁷։

Մեղ հետաքրքրող ժամանակաշրջանում երկրի տնտեսական քայքայումն արտացոլվել է նաև մի այնպիսի ուշագրավ փաստաթղթում, ինչպիսին Ռրկոնիի ընծայագիրն է⁷⁸։ Համաձայն այդ վավերագրի, մոնղոլների կողմից 1258 թ. Բաղդադը գրավվելուց հետո՝ 1250-ական թվականների վերջին կամ 1260-ականների սկզբին, Սամցխեի էրիսթավներից մեծուրեթ-ուբուլուցես Կախա Թորեյին ոմն խոջա Սալամից ու նրա որդուց, հայ Հասանից ու հրեա Հովսեփից գնել է խովլե գյուղը (Վրաց. ՍՍՀ Կասպի շրջանում) և նվիրել Ռկոնիի վանքին։ Վերջիններս իրենց հերթին խովլեն 65 հազար սպիտակով ձեռք էին բերել ոմն Աղբուղայից ու նրա որդիներից⁷⁹։ Ընդ որում, Աղբուղայի հայր Վահրամին այդ գյուղը նվիրել էին «ափիազաց (իմա՝ վրաց) թագավորները»⁸⁰։ Այս սկզբնաղբյուրի հատուկ քննությամբ զբաղված Ն. Շոշիաշվիլին այնտեղ հիշատակված Վահրամի ու Աղբուղայի և Վահրամ Գագեցու ու նրա որդի Աղբուղայի նույնացումը համարել է հավանական⁸¹։ Նման ենթադրությունը բնորոշել է, քանի որ կան զրա օգտին խոսող լուրջ կուլաններ։ Ինչպես տեսանք, խովլեն վաճառքը Աղբուղան կատարել է որդիների հետ, հանգամանք, որ խոսում է նրանց հոմիլիստության մասին։ Բայց չէ որ վերոբերյալ հիշատակարանի համաձայն, Աղբուղա Վահրամյանն ու նրա որդիները ևս հոմիլիսան էին։ Ընդ որում, որ տվյալ պարագայում կարևոր է, թե՛ խովլեն վաճառող Աղբուղան և թե՛ Աղբուղա Վահրամյանն ունեին մի քանի որդի։ Պակաս էական չէ և այն հանգամանքը, որ խնդրո առարկա ժամանակամիջոցում սկզբնաղբյուրները Վահրամ Գագեցուն և Աղբուղային համանուն այլ հայր ու որդի իշխաններ չեն հիշատակում։ Ինչ վերաբերում է ընծայագրում հիշատակված «ափիազաց թագավորներին», ապա դրանք ոչ այլ ոք էին, եթե ոչ Ուլու և Նարին Դավիթները, որոնք թագադրվելուց հետո սկզբում (մինչև 1259 թ.) Տփլիսում համատեղ էին գահակալում և արքայական հրովարտակները միասին էին վավերացնում⁸²։ Հենց նրանք են 1247—1250 թթ. խովլեն նվիրել Վահրամին։ Իայց չէ որ Ուլու Դավիթը դրանով էր կարող վարձահատույց եղած լինել Վահրամ Գագեցուն՝ իրեն մատուցած մեծ ծառայության դիմաց, իսկ Դավիթ Նարինը որպես գահակից վավերացրել է այդ հրովարտակը, որի մասին հիշատակում է Կախա Թորեյին⁸³։

Եթե մեր այս դատողությունները ճիշտ են, ապա հանձին վերոհիշյալ ընծայագրի գործ ունենք 1254 թ. Արղունի անցկացրած աշխարհագրից հետո (որով մոնղոլական հարկային լուծն ավելի ծանրացավ) ոչ միայն երկրում, այլև մասնավորապես Վահրամյանների տիրույթներում, հողային հարաբերությունները և հողատերերի ժառանգական իրավունքները կարգավորող նորմերն արտացոլող եզակի փաստաթղթի հետ։ Պարզվում է, որ մոնղոլական կեղեքիչ հարկային լծի պայմաններում կալվածքային տնտեսությունները դադարել էին եկամտաբեր լինելուց և դարձել առուծախի առարկա։ «Այդ ժամանակ,— կարդում ենք ընծայագրում,— շատ... հողեր մարդկանց վրա ծանրացած հարկատվության պատճառով վաճառվում էին։ Ոսկին դարձել էր թանկ, իսկ գյուղն էժանացել էր»⁸⁴։

⁷⁷ Մատենադարան, ձեռ. № 2273, ք. 361բ։

⁷⁸ В. Д. Дондуа, Писанье о вкладе Кахи Торели в Рконский монастырь («Ջարտլու Մյարոտմցոլոմեթ», Թ. II. տծոլոս, 1968, թ. 50—76)։

⁷⁹ Նույն տեղում, էջ 55։

⁸⁰ Նույն տեղում, էջ 59։

⁸¹ Н. Ф. Шощина и Шили, Рконокая грамота (автореферат канд. диссертации), Тбилиси, 1953, с. 6.

⁸² «Վրաց ժամանակագրություն», էջ 101։

⁸³ «Ջարտլու Մյարոտմցոլոմեթ», Թ. II. թ. 59.

⁸⁴ Նույն տեղում, էջ 54։

1256 թ. մեծ խան Մանգուն իր եղբայր Հուլավուին նշանակեց Առաջավոր Ասիայում կազմակերպված նոր ուլուսի կառավարիչ: Այդ ուլուսը շուտով դարձավ փանտորեն անկախ պետություն, ստանալով իշխանություն անունը: Հրակայական զորքով ժամանելով Անդրկովկաս, Հուլավուն բանակեց Մուղանի դաշտավայրում և սկսեց պատրաստվել դեպի Ալամութ, Բաղդադ ու հյուսիսային Միջագետք արշավելուն: 1257 թ. սկսված այդ արշավանքներին մոնղոլական բանակի կազմում մասնակցում էին նաև հայ ու վրաց իշխաններն իրենց զորքերով: Չնայած սկզբնաղբյուրներում այդ արշավանքներին Աղբուղայի և նրա որդիներին մասնակցելու մասին փաստեր չկան, բայց, անկասկած, նրանք ևս եղել են արշավողների շարքերում: Նման պնդման համար հիմք է տալիս Բաղդադի և Նիքիեի (Մայաֆարկին) գրավմանը Վահրամյանների վասալ Թաղիադինի՝ Մածնաբերդի կյուրիկյան իշխան կյուրիկեի որդու, մասնակցությունը⁸⁵: Թաղիադինի ջոկատը կազմում էր Վահրամյանների զորքի մի մասը, քանի որ ներկայացնում էր նույն թումանը: Թաղիադինի հայր կյուրիկեի հիշատակվում է խորանաշատի վանքի 1246 թվակիր նվիրատվական արձանագրության մեջ⁸⁶: կյուրիկեն ուներ ևս երկու որդի՝ Փահլավան և Աղսարթան⁸⁷: Մածնաբերդի կյուրիկյանների հաջորդ սերնդի ներկայացուցիչներից հայտնի է միայն Թաղիադինի որդի Սարգիսը: Հաղթատի արձանագրություններից մեկի համաձայն 1249 թ. վանահայր Համազասպի եղբայր Գրիգորը «գանձով» կյուրիկյանների այդ շառավղից գնել է Ակոսվաձոր գյուղն ու նվիրել Հաղթատի վանքին⁸⁸: Պատահական չէ, որ այստեղ ևս գործ ունենք ավատի կողմից իր կալվածքը հանդիսացող գյուղի վաճառքի հետ: Այս փաստը խոսում է Մածնաբերդի կյուրիկյանների վերջին շառավղիների տնտեսական քայքայման և աստիճանական հողազրկման մասին:

Վահրամյանների մյուս վասալների՝ Նոր Բերդի կյուրիկյանների մասին ևս շատ կցկտուր տեղեկություններ են պահպանվել, որոնք հասնում են մինչև 1237 թ.: Արդեն նշեցինք, որ Վասակ իշխանը շարունակեց Վահրամյանների իշխանության հոգևոր կենտրոն Նոր Վարագի վանական համալիրի շինությունները: 1237 թ. ավարտելով Աստվածածին եկեղեցու կառուցումը: Այն օծվեց 1240 թ.⁸⁹: Վասակի կինն էր անեցի հեջուր Վահրամի դուստր Խաթունը⁹⁰: Հռոմոսում Նոր Բերդի իշխանուհու թողած արձանագրությունից երևում է, որ նրանք ժառանգ չեն ունեցել⁹¹: Վասակի մահվան թվականը հայտնի չէ: Նրանից հետո Վահրամյանների իշխանության հոգևոր առաջնորդ արքեպիսկոպոս Հովհաննես Տուեցին կառուցեց Նոր Վարագի գավիթը: Վասակ իշխանի մահվանից հետո Նոր Բերդի կյուրիկյանների հողերն անցան Վահրամյաններին:

Մոնղոլական տիրապետությունը բացասական հետևանքներ ունեցավ նաև Վահրամյանների իշխանության բուռն ծաղկում ապրող մշակութային կյանքի վրա: Ըիշտ է, սկզբնական շրջանում այն շարունակում էր իր վերելքը, սակայն արդեն 1280-ական թվականներին սկսեց լճացում ապրել և ի վերջո մարեց: Արդեն նշվեց, որ Վահրամյանների իշխանության տարածքում էր գործում վանական վարդապետը: Նրա ղեկավարած դպրոցի հոշակն այնքան մեծ էր, որ այնտեղ ուսանելու էին գալիս Հայաստանի անգամ ամենահեռավոր դավառներին: Մոնղոլական գերությունից ազատվելուց հետո վանական վերագործավ խորանաշատ և շարունակեց վանքի կառուցումն ու իր գիտամանկավարժական բազմաբեղուն գործունեությունը: 1246 թ. ամենայն հավանականությամբ համազգային նշանակություն ունեցող հարց լուծելու նպատակով խորանաշատ են այցելել հայոց կաթողիկոս Կոստանդինը և Աղվանից կաթո-

85 Գրիգոր Ա կանցի, էջ 28:

86 Արմֆանի «Տեղեկագիր», 1940, № 4—5, էջ 175:

87 Կիրակոս Գանձակեցի, էջ 154:

88 Կարո Ղաֆադարյան, Հաղթատ, Երևան, 1963, էջ 177:

89 Կիրակոս Գանձակեցի, էջ 153:

90 Արմֆանի «Տեղեկագիր», 1940, № 4—5, էջ 172:

91 Նույն տեղում:

դիկոս ներսեսը: Այդ են վկայում վանքում նրանց թողած արձանագրությունները⁹², վանականի մահվանից հետո (1251) հորանաշատ դպրոցի ղեկավարությունը ստանձնեց նրա ազգական և աշակերտ Գրիգորիս վարդապետը⁹³, որի օրոք կրթական այդ օջախը սկսեց կորցնել իր երբեմնի փայլը: Խորանաշատում շնայած XIII դ. երկրորդ կեսին ևս գրչագրվում էին տարաբնույթ ժողովածուներ, բայց այն անկում ապրեց նաև որպես գրչության կենտրոն:

Վահրամյանների իշխանության մասին մեր հաջորդ տեղեկությունը թվագրվում է 1284-ով: Այդ թվականին վրաց թագավորը Դեմետրիեն, աթաբեկ նշանակված Տարսալիճ Օրբելյանի ենթակայության է հանձնում «Ջամենայն աշխարհս Հայոց, զստունն Ավագեան, և զստունն Շահնազհան և զԳագեցին և զորդիսն Սաղուն աթաբեկին»⁹⁴: Ստեփանոս Օրբելյանի այս տողերից պարզվում է, որ Վահրամյանների իշխանությունը 1280-ական թվականներին ևս Գյուրջիստանի վիլայեթի մեջ մտնող ավատական խոշոր միավորներից էր: Չնայած դրան, Վահրամյանները երկրի կյանքում նախկին ազդեցությունը չունեին:

Ստեփանոս Օրբելյանի վերոհիշյալ վկայությունը Ջաբարյան Հայաստանի (և ոչ միայն) կյանքում կարևոր դեր ունեցած Վահրամյանների ավատական տան և նրանց իշխանության վերաբերյալ գիտական շրջանառության մեջ եղած աղբյուրներում պահպանված վերջին փաստն է: Սակայն սխալ կլինի կարծել, թե 1280-ական թվականներից անմիջապես հետո Վահրամյանները հեռացան պատմության թատերաբեմից, իսկ նրանց իշխանությունը գաղարեց գոյություն ունենալուց: Անկասկած, Վահրամյանների ճյուղավորումների բաժանված շառավիղները XIII դ. վերջին—XIV դ. շարունակում էին գոյատևել և Ջաբարյան ավատական տան ավագ ճյուղերի ժառանգորդների նման իշխել իրենց մասնատված տիրույթներում, որոնք պարփակված էին Վահրամյանների երբեմնի հզոր ու լայնածավալ իշխանության լեռնային անմատույց շրջաններում:

КНЯЖЕСТВО ВАГРАМИДОВ ВО ВРЕМЕНА ВЛАДЫЧЕСТВА МОНГОЛОВ

АРТАШЕС ШАХНАЗАРЯН

Резюме

Княжество Ваграмидов, образовавшееся в конце XII—начале XIII вв. на значительной части территории областей исторической Армении: Колболора, Тавуша, Гардмана, Парисоса и Шакашена, в 1235/1236 г. было завоевано монголами. Иноземное владычество имело пагубные последствия как для всей Армении, так и, в частности, для этого некогда процветавшего феодального княжества. Несмотря на то, что Ваграмидский князь Ваграм Гатечи играл видную роль в политической жизни страны, после его смерти (1250/1251) Ваграмидам не удалось сохранить прежние позиции. Начиная с конца XIII в. Ваграмиды постепенно сошли с исторической арены, а их земли, по всей вероятности, были раздроблены на мелкие владения.

⁹² Նույն տեղում, էջ 177:

⁹³ Էրիրակոս Գանձակեցի, էջ 348:

⁹⁴ Ստեփանոս Օրբելյան, էջ 426: